

宋史新編

宋史新編卷二十七

志十三

明南京戶部主事許田柯維騏著

禮二

封禪太宗立之八年泰山父老詣闕請東封帝厚賜遣之明年復請宰臣宋琪等三上表請乃允隨以宮殿災罷真宗大中祥符元年兗州父老及諸道貢士詣闕請宰臣王旦等率內外文武官吏蕃夷僧道父老二萬餘人五表請乃允詔十月封泰山是月帝蔬食止樂以二十四日辛亥行事遣使詣岳州采三春茅以玉爲玉牒聯以金繩絨以玉匱置石罍中正坐配坐用玉卮六其

置纏以金繩封以金泥印以受命寶又用金鑄寶曰天
下同文以封燧際玉冊文曰嗣天子臣某敢昭告于昊
天上帝臣嗣膺景命昭事上穹昔太祖揖讓開基太宗
憂勤致治廓清寰宇混一車書固抑升中以延積慶元
符錫祚衆寶效祥異域咸懷豐年屢應虔修封祀祈福
黎元謹以玉帛犧牲粢盛庶品備茲禋燎式薦至誠皇
伯考太祖皇帝皇考太宗皇帝配神作主尚享玉牒文
見本紀明日壬子禪祭皇地祇于社首山玉冊文曰嗣
天子臣某敢昭告于皇地祇無私垂祐有宋肇基命惟
天啓慶賴坤儀太祖神武威震萬寓太宗聖文德綏九

土臣恭膺寶命纂承丕緒穹昊降祥靈符下付景祚延
鴻祕文昭著八表以寧五兵不試九穀豐穰百姓親比
方輿所資涼德是愧溥率同詞縉紳協議因以時巡亦
既肆類躬陳典禮祇事厚載致孝祖宗潔誠嚴配以伸
大報聿脩明祀本支百世黎元受祉謹以玉帛犧牲粢
盛庶品備茲禋瘞式薦至誠皇伯考太祖皇帝皇考太
宗皇帝配神作主尚饗畢事大赦天下改乾封縣曰奉
符縣帝往還四十七日未嘗遇雨雪嚴冬之候景氣恬
和祥應紛委政和中臣民屢請東封祭京當國將講封
禪以文太平預具金繩玉檢及他物甚備造舟四千艘

雨具亦千萬計迄不能行

汾陰后土真示東封又明年以羣臣請詔許四年春祀
汾陰后土乃以二月辛酉行事玉冊文曰嗣天子臣某
敢昭告于后土地祇恭惟位配穹昊化敷品彙瞻言分
壤是宅景靈備禮親祠抑惟令典肇啓皇宋混一方輿
祖禰紹隆承平茲久眇躬纘嗣勵翼靡違厚德資生綿
區允穆清寧享祐戴履蒙休申錫寶符震以珍物虔遵
時邁已建天封明察禮均有所未答櫛沐祇事用致其
恭夷夏駿奔瑄牲以薦肅然郊上對越坤元式祈年豐
懋昭政本兆民樂育百福蕃滋介祉無疆敢忘祇畏恭

以琮幣犧牲粢盛庶品備茲瘞禮皇伯考太祖皇帝皇考太宗皇帝侑神作主尚享諸儀六略如東封

太清宮大中祥符六年亳州父老等三千三百人詣闕請朝謁太清宮群臣表請從之七年正月二十一日朝謁奉上太上老君混元上德皇帝加號冊寶玉匱金繩如封禪儀初大中祥符元年正月乙丑帝謂輔臣曰朕去年十一月二十七日夜將半方就寢忽室中光曜見神人星冠絳衣告曰來月三日宜於正殿建黃籙道場一月將降天書大中祥符二篇朕竦然起對已復無見命筆識之自十二月朔卽齋戒於朝元殿建道場以侑

神呪適皇城司奏左承天門屋南角有黃帛曳鴟尾上帛長二丈許緘物如書卷纏以青縷三道封處有字隱隱蓋神人所謂天降書也王旦等皆再拜稱賀帝卽步至承天門瞻望再拜遣二內臣升屋奉之下旦跪奉而進帝再拜受之親奉安輿導至道場帛上有文曰趙受命興於宋付於脊居其器守於正世七百九九定緘書甚密扶以利刀方起其書黃字三幅詞類書洪範老子道德經始言帝能以至孝至道紹世次諭以清淨簡儉終述世祚延永之意讀訖帝復跪奉繭以所緘帛盛以金匱丙寅群臣入賀賜宴帝與輔臣皆蔬食遣官奏告

天地宗廟社稷及京城祠廟遂改元四月辛卯朔天書
再降內中功德閣六月八日封祀制置使王欽若奏天
書降泰山林木上授中使捧詣闕帝趣召輔臣曰朕五
月丙子夜復夢鄉者神人言未敢宣露今果與夢協其
文曰汝崇孝奉育民廣福錫爾嘉瑞黎庶咸知祕守斯
言善解吾意國祚延永壽歷遐歲封禪日皆奉以升壇
置正位之東自是凡舉大禮皆如之天禧元年正月詔
以十五日行宣讀天書之禮有司設次天安殿中位玉
皇像置錄本天書於東聖祖板位于西建金籙道場三
晝夜其日三鼓帝詣道場焚香再拜西向立百官朝服

升殿攝中書令任中正跪奏嗣天子臣某謹與宰臣等
宣讀天書講求聖意虔思睿訓撫育生民攝太尉向敏
中宣讀每句已卽詳繹其旨言上天訓諭之意攝中書
令王欽若錄之宣讀畢攝侍中張旻跪奏嗣天子臣某
敢不虔遵天命又取功德閣天書泰山天書宣讀如上
儀帝自作欽承寶訓述以示中外先是帝於大中祥符
五年十月語輔臣曰朕夢降神人傳玉皇之命云先令
汝祖趙玄朗授汝天書令再見汝如唐朝恭奉玄元皇
帝翌日復夢神人傳天尊言吾坐西斜設六位以候是
日卽於延恩殿設道場五鼓一籌先聞異香頃之黃光

滿殿蔽燈燭覩靈仙儀衛天尊至朕再拜殿下俄黃霧
起須臾霧散由西陛升見侍從在東陛天尊就坐有六
人揖天尊而後坐朕欲拜六人天尊止令揖命朕前曰
吾八皇九人中一人也是趙之始祖再降乃軒轅皇帝
凡世所知少典之子非也母感電夢天人生於壽丘後
唐時奉玉帝命七月一日下降總治下方主趙氏之族
今已百年皇帝善爲撫育蒼生無怠前志卽離坐乘雲
而去王旦等皆再拜稱賀卽命參知政事丁謂等與禮
官脩崇奉儀注閏十月制九天司命保生天尊號曰聖
祖上靈高道九天司命保生天尊大帝聖祖母號曰元

天大聖后七年九月卽滋福殿設玉皇像八年正月朔
詣玉清昭應宮奉表奏告上玉皇大帝聖號曰太上開
天執符御曆含真體道玉皇大天帝奉刻玉天書安寶
符閣以帝御容侍立于側天禧元年正月朔上玉皇聖
號寶冊二日詣景靈宮上聖祖天尊大帝徽號寶冊三
月王旦等詣兗州太極觀奉冊上聖祖母懿號徽宗政
和六年九月朔詣玉清和陽宮奉玉冊玉寶上玉帝尊
號曰太上開天執符御曆含真體道昊天玉皇上帝明
年五月又上地祇徽號曰承天效法厚德光大后土皇
地祇徽宗崇尚道教制郊祀大禮以方士百人執威儀

前引分列壇下政和三年冬至祀園丘太師蔡京奏天
神降格實爲大慶乞付史館帝出手詔播告天下製天
真示現記尋以天神降日爲天應節卽其地建迎真宮
明年夏至躬祀方丘又製神應記略云羽衛多士奉輦
武夫與陪祝官顧瞻中天有形有像若人若鬼持矛執
戟列於空際見者駭愕又先時用方士魏漢津之說鑄
鼎九於中太一宮南爲殿奉安之復於帝乘之宮立大
角鼎星祠既又奉安九鼎於九成宮事具五行志六年
用方士王仔昔議定鼎閣於天章閣徙九鼎奉安之八
年復用方士言鑄神霄九鼎奉安於上清寶籙宮

至聖文宣王廟太祖因周之舊增脩塑先聖亞聖十哲
像畫七十二賢先儒二十一人像于東西廡木壁親製
先聖亞聖贊餘命文臣爲之其春秋二丁及仲冬上下
貢舉人謁先聖先師命官釋奠皆如舊典廟門立戟十
六枝用一品之禮冕服九旒非如唐開元用王者衮冕
也皇帝幸國子監則謁廟真宗東封幸曲阜謁孔廟酌
獻服韡袍廟內外設黃麾仗有司定儀肅揖帝特展拜
親製贊刻之石孔林樹擁道帝降輿乘馬設奠於墓再
拜追謚玄聖文宣王詳見孔宜傳明年詔封十哲爲公
七十二弟子爲侯先儒爲伯或贈官親製玄聖文宣王

贊顏子以下宰臣分贊後改至聖避國諱也釋奠故事以祭酒司業博士充三獻後以三公行事大中祥符三年以判監孫奭請備差太尉太常光祿卿充三獻又頒釋奠儀注并祭器圖於諸路仁宗詔釋奠用登歌謁廟特再拜自是有再拜禮熙寧中封孟軻鄒國公議者請與顏子並配禮官言孟子於孔門當在顏子之列宜塑像配食至於荀况揚雄韓愈皆發明先聖之道有益學者宜繪像加封爵以世次先後從祀從之荀况等並封伯崇寧初以王安石配享列孟軻之次已而辟雍文宣王殿以大成爲名改用冕十二旒服九章執圭立戟並

如王者之制大觀元年以大司成強淵言令每歲貢士始入辟雍並以元日行釋菜禮二年禮局言史記弟子傳曰受業身通六藝者七十有七人家語曰七十二弟子皆升堂入室按唐會要七十七人開元禮止七十二人去取不一本朝議臣斷以七十二子之說取琴張等五人去公夏首等十人今以家語史記參定焉政和三年封王安石舒王子雱臨川伯從祀五年詔鄒縣孟子廟以樂正子配享公孫丑以下從祀皆擬定封爵靖康初詔安石降從祀紹興十三年臨安太學成高宗臨幸作先聖及七十二弟子贊冠以序文御書揭殿廡後又

刻石監中以碑本徧賜郡學孝宗幸學去壬寅畫像理
宗幸學詔以周敦頤張載程顥程頤朱熹從祀黜王安
石先是熹封國公及是敦頤載顥頤並封伯製道統十
三贊賜國子監宣示諸生景定中皇太子請學從其請
以張栻呂祖謙從祀並封伯咸淳三年詔封曾參邾國
公孔伋沂國公配享封顥孫師陳國公升十哲復以邵
雍司馬光列從祀其序堯公顏回邾公會參沂公孔伋
鄒公孟軻居正位之東面西向北上爲配位費公閔損
薛公冉雍黎公端木賜衛公仲由魏公卜商居殿上東
面西向北上鄆公冉耕齊公宰予徐公冉求吳公言偃

陳公顓孫師居殿上西面東向北上爲從祀東廡金鄉
侯澹臺滅明任城侯原憲汝陽侯南宮适萊蕪侯曾點
須昌侯商瞿平輿侯漆雕開睢陽侯司馬耕平陰侯有
若東阿侯巫馬施陽穀侯顏辛上蔡侯曹卹枝江侯公
孫龍馮翊侯秦祖雷澤侯顏高上邳侯壤駟赤成邑侯
石作蜀鉅平侯公夏首膠東侯后處濟陽侯奚容點富
陽侯顏祖洛陽侯句井疆鄆城侯秦商卽墨侯公祖句
茲武城侯縣成沂源侯燕伋宛句侯顏之僕建成侯樂
效堂邑侯顏何林慮侯狄墨邾城侯孔忠徐城侯公西
點臨濮侯施之常華亭侯秦非文登侯申棖濟陰侯顏

曾泗水侯孔鯉蘭陵伯荀况睢陵伯穀梁赤萊蕪伯高
堂生樂壽伯毛萇彭城伯劉向中牟伯鄭眾緱氏伯杜
子春良鄉伯盧植滎陽伯服虔司空王肅司徒杜預昌
黎伯韓愈河南伯程顥新安伯邵雍溫國公司馬光華
陽伯張栻凡五十二人竝西向西廡單父侯宓不齊高
密侯公冶長北海侯公皙哀曲阜侯顏無繇共城侯高
柴壽張侯公伯寮益都侯樊須鉅野侯公西赤千乘侯
梁鱣臨沂侯冉孺沐陽侯伯虔諸城侯冉季濮陽侯漆
雕哆高苑侯漆雕徒父鄒平侯商澤當陽侯任不齊牟
平侯公良孺新息侯秦冉梁父侯公肩定聊城侯鄒單

祁鄉侯罕父黑淄川侯申黨獻次侯榮旂南華侯左人

郢胸山侯鄭國樂平侯原亢胙城侯廉潔博平侯叔仲

會高堂侯邾巽臨胸侯公西輿如內黃侯濊瑗長山侯

林放南頓侯陳亢陽平侯琴張博昌侯步叔乘中都伯

左丘明臨淄伯公羊高乘氏伯伏勝考城伯戴聖曲阜

伯孔安國成都伯揚雄岐陽伯賈逵扶風伯馬融高密

伯鄭玄任城伯何休偃師伯王弼新野伯范甯汝南伯

周敦頤伊陽伯程頤郟伯張載徽國公朱熹開封伯呂

祖謙凡五十二人竝東向初大觀中禮部太常寺請自

昔著名筭數者畫像兩廡加賜封爵於是封風后箕子

周大夫商高大撓諫首容成常儀鬼俞區商巫咸竝爲
公封晉史蘇秦卜徒父晉卜偃魯梓慎晉史趙魯卜楚
丘鄭裨竈趙史墨周榮方齊甘德魏石申漢鮮于妄人
耿壽昌夏侯勝京房易奉李尋張衡周興單颺樊英晉
郭璞宋何承天北齊宋景業隋蕭吉臨孝恭張胃玄周
王朴竝爲伯漢鄧平劉洪魏管輅吳趙達宋祖冲之後
魏商紹北齊信都芳許遵隋耿詢劉焯劉炫唐傅仁均
王孝通瞿曇羅李淳風王希明李鼎祚邊岡漢郎顛襄
楷竝爲子封司馬季主洛下閎嚴君平魏劉徽晉姜岌
張丘建夏侯陽後周甄鸞隋盧大翼竝爲男中書舍人

張邦昌所定也尋詔以黃帝爲先師禮部員外郎吳時
言書畫之學教養生徒使知以孔子爲師此道德之所
以一也請春秋釋奠止令書畫博士量率生員陪與執
事庶使知所宗師醫學亦準此從之

昭烈武成王廟自唐立太公廟上元初封爲武成王始
置亞聖十哲等從祀後又加七十二弟子建隆三年詔
脩廟與國學相對乾德元年帝幸廟歷觀圖壁指白起
曰此人殺已降不武之甚何受享於此命去之大中祥
符元年加諡昭烈慶曆儀自張良管仲而下依舊配享
不用建隆升降之次宣和五年禮部言從祀未經封爵

之人管仲以下擬封侯伯釋奠日以張良配享殿上管仲孫武樂毅諸葛亮李勣竝西向田穰苴范蠡韓信李靖郭子儀竝東向東廡白起孫臏廉頗李牧曹參周勃李膺霍去病鄧禹馮異吳漢馬援皇甫嵩鄧艾張飛呂蒙陸抗杜預陶侃慕容恪宇文憲韋孝寬楊素賀若弼李孝恭蘇定方王孝傑王峻李光弼竝西向西廡吳起田單趙奢王翦彭越周亞夫衛青趙充國寇恂賈復耿弇段穎張遼關羽周瑜陸遜羊祜王濬謝玄王猛王鎮惡斛律光王僧辯于謹吳明徹韓擒虎史萬歲尉遲敬德裴行儉張仁亶郭元振李晟竝東向凡七十二人紹

興十一年以管仲至郭子儀十八人祀殿上乾道六年升李晟於堂上降李勣於李晟位次仍以曹彬從祀言者謂李勣邪說誤國唐祀幾滅李晟有再造勳云

先代帝王祠廟及陵墓太祖卽位詔脩帝王祠廟重定配享女媧祠在晉州乏配太昊以金提勾芒配祠在陳州炎帝以祝融配祠在衡州黃帝以后土風后力牧配祠在坊州高陽以玄冥配祠在澶州高辛以稷配祠在宋州唐堯以司徒禹配祠在鄆州虞舜以絲配祠在道州夏禹以伯益配祠在越州商帝成湯以伊尹配祠在河中府中宗太戊以伊陟臣扈配祠在大名府高宗帝

武丁以甘盤傳說配祠在陳州周文王以師鬻能配武
王以召公配成王以周公旦唐叔升虞叔配康王以太
公畢公配秦始皇帝以李斯蒙恬王翦配漢高帝以蕭
何配文帝以周勃陳平劉章宋昌配景帝以周亞夫竇
嬰中著嘉鼎錯配武帝以公孫弘衛青霍去病金日磾
配宣帝以丙吉魏相霍光張安世配以上至周文王十
帝祠在長安後漢世祖以鄧禹吳漢耿弇賈復配明帝
以東平王蒼桓榮配章帝以牟融趙意宋安配以上二
廟並在河南府魏武帝以鍾繇荀攸程昱配廟在相州
文帝以賈詡王朗曹真辛毗配晉武帝以羊祜張華王

潛什預配二廟在河南府後魏孝文帝以王祥王肅長
孫晟配後周文帝以宇文憲蘇綽燕公子謹盧辨配二
廟在耀州隋高祖以牛弘高祖贊若攷配廟在鳳翔府
唐高祖以河間王孝恭殷開山劉政會淮南王神通配
廟在耀州太宗以長孫無忌房玄齡杜如晦魏徵李靖
配廟在東京兆府明皇以張說郭元振王琚配廟在河中
府肅宗以苗晉卿裴冕配廟在東京兆府憲宗以裴度杜
佑李愬配廟在通州宣宗以夏侯孜白敏中馬植配廟
在耀州朱梁太祖以劉鄩敬翔葛從周袁象先配後唐
莊宗以郭崇韜李嗣昭符存審配明宗以霍彥威安重

進任園配石晉高祖以桑維翰趙瑩配以上竝在河南
府時吳蜀未平間有缺者政和新儀無大增損其帝王
陵墓自建隆初詔郡國置戶以守乾德中詔諸陵廟給
祭器又定太昊女媧炎帝黃帝顓頊高辛堯舜及三代
以來創業守成諸陵置五戶或三戶或兩戶有差春秋
祀太牢或歲一祀或三歲一祀周桓王景王威烈王及
歷代衰替諸君禁樵採開寶三年詔西京鳳翔雄耀等
州周文成康三王秦始皇漢高文景武元成哀七帝後魏
孝文西魏文帝後周太祖唐高祖太宗中宗肅代德順
文武宣懿僖昭諸帝凡二十七陵嘗被盜發者有司備

法服常服各一襲具棺槨重葬所在長吏致祭若乃功臣烈士之墓建隆亦有優詔乾德中又第其優劣以孫臏晏嬰程嬰公孫杵臼樂毅曹參陳平韓信周亞夫衛青霍去病霍光蜀昭烈帝關羽張飛諸葛亮房玄齡長孫無忌魏徵李靖李勣尉遲恭渾瑊段秀實等爲上各守冢三戶趙簡子孟嘗君趙奢丙吉高士廉唐儉岑文本馬周爲次各二戶慕容德裴寂元稹又爲次各禁樵採開發者亦重葬累朝凡帝王陵廟及名臣賢士義夫節婦墳隴屢敕脩葺真宗青州建太公廟兗州建周公廟孔子墓增二千戶裴度墓置三戶哲宗祀顏真卿墓

高宗越州祠句踐以范蠡配此其大者也

諸祠廟自開寶皇祐以來凡天下名在地理功及生民
宮觀陵廟名山大川能興雲雨者並加崇飾增入祀典
熙寧復詔諸神祠無爵號者賜廟額已賜額者加封爵
徽宗時言者謂歸州屈原廟封清烈公在潭州者封忠
潔侯永康軍李冰廟已封廣濟王近乃封靈應公宜取
一高爵爲定悉改正之他皆倣此其後新立廟若何承
矩李允則守雄州曹瑋帥秦州李繼和節度鎮戎軍則
以有功一方者也韓琦在中山范仲淹在慶州孫冕在
海州則以政有威惠者也王承偉築祁州河隄張夏築

錢塘江岸則以爲人除患者也封州曹觀德慶府趙師
旦邕州蘇緘恩州董元亨馬遂則死於亂賊者也若王
韶於熙河李憲於蘭州劉沔於水洛城郭成於懷慶軍
折御卿於嵐州王吉於麟州各以功業建廟寇準死雷
州人憐其忠而趙普祠中山韓琦祠相州則以鄉里皆
載祀典神宗當皇嗣未立也封程嬰成信侯公孫杵臼
忠智侯立廟絳州高宗時言者表韓厥之功乃立祚德
廟竝祀後累封嬰彊濟公杵臼英略公厥啓侑公升爲
中祀淳熙中用靜江守臣張栻請堯山虞山二祠增入
祀典他嶽瀆城隍仙佛諸神南渡後往往由禱應而封

賜之死難之臣立廟尤多不能悉錄

宗廟之制建隆初兵部尚書張昭等奏堯舜禹皆五廟二昭二穆與其始祖也商六廟昭穆之外祀契與湯也周七廟親廟之外祀太祖與文武也漢初立廟悉不如禮魏晉始復七廟江左相承然七廟猶虛太祖之室隋文但立高曾祖禰四廟而已唐沿隋立親廟梁氏而下不易其法稽古之道斯爲折衷伏請崇建四代廟室從之太宗祔廟判太常禮院李宗訥等言按爾雅有考妣王父母曾祖王父母高祖王父母及世父之別以此觀之唯父母得稱考妣今請僖祖止稱廟號順祖而下卽

依爾雅之文下尚書省議戶部尚書張齊賢等言漢書
爲人後者爲之子所以尊本祖而重正統也宗廟中無
伯氏之稱唐及五代有之蓋禮官之失非正典也太祖
并諸祖室宜稱孝孫孝曾孫嗣皇帝太宗室稱孝子嗣
皇帝其爾雅考妣王父之文亦不爲宗廟言也下禮官
議議曰按春秋正義躋魯僖公云禮父子異昭穆兄弟
昭穆同此明兄弟繼統同爲一代又魯隱桓繼又皆當
穆位又尚書盤庚有商及王史記云陽甲至小乙兄弟
四人相承故不稱嗣子而曰及王明不繼兄之統也又
唐中睿皆處昭位敬文武昭穆同爲一世伏請太祖室

曰皇伯考妣太宗室曰皇考妣每大祭太祖太宗昭穆
同位祝文並稱孝子詔都省復集議曰古者祖有功宗
有德皆先有其實而後正其名今太祖太宗則百世不
祧之廟矣若太宗不得自爲世數何以得爲宗乎不得
爲宗何以得爲百世不祧之主乎翰林學士宋湜言三
代而下兄弟相繼無昭穆異位者詔禮官再議禮官言
按祭統曰祭有昭穆者所以別父子遠近長幼親疎之
序而無亂也公羊傳公孫嬰齊爲兄歸父之後春秋謂
之仲嬰齊何休云弟無後兄之義爲亂昭穆之序失父
子之親故不言仲孫明不以子爲父孫晉賀循議兄弟

不合繼位昭穆云商人六廟親廟四彝契湯而六比有兄弟四人相襲爲君者便當上毀四廟乎如此四世之親盡無復祖禰之神矣溫嶠議兄弟相繼藏主夾室之事云若以一帝爲一世則當不得祭於禰乃不及庶人之祭也又按太宗享祀太祖二十有二載稱曰孝弟此不易之制又安可追改乎唐玄宗謂中宗爲皇伯考德宗謂中宗爲高伯祖則伯氏之稱復何不可臣等參議自今合祭曰太祖太宗依典禮同位異坐皇帝於太祖仍稱孝子餘並遵舊制仁宗初真宗祔廟直祕閣趙希言奏禮天子十廟親廟五祧廟二據古則僖順二祖當

遷更立祧廟同判太常寺宋祁言鄭康成謂周制立二
昭二穆與太祖文武共爲七廟此一家之說未足援正
自荀卿王肅等皆云天子七廟諸侯五大夫三士一降
殺以兩則國家七世之數不用康成之說也僖祖至真
宗方及六世不應便立祧廟自周漢每帝各立廟晉宋
以來多同殿異室國朝以七室代七廟相承已久不可
輕改其神御法物寶蓋鉤牀請別爲庫藏之自是室題
廟號建神御庫焉嘉祐八年仁宗將祔廟祭襄上八室
圖爲十八間初禮院請增廟室孫抃等以爲七世之廟
據父子而言兄弟則昭穆同不得以世數之國朝太祖

之室太宗稱孝弟真宗稱孝子大行稱孝孫而禘祫圖
太祖太宗同居昭位南向真宗居穆位北向蓋先朝稽
用古禮著之祀典大行神主祔廟請增爲八室以備天
子事七世之禮盧士宗司馬光以爲太祖已上之主雖
屬尊於太祖親盡則遷故漢元之世太上廟主瘞於寢
園魏明之世處士廟主遷於園邑晉武祔廟遷征西府
君惠帝祔廟遷豫章府君自是以下大抵過六世則遷
唐玄宗立九室祀八世事不經見今大行祔廟僖祖親
盡當遷夾室祀三昭三穆於先王典禮及近世之制無
不符合抃等復議曰自唐至周廟制不同而皆七世自

周以上所謂太祖非始受命之主特始封之君而已
僖祖雖非始封之君要爲立廟之祖方廟數未過七世
遂毀其廟遷其主攷之三代禮未有此漢魏及唐一時
之議恐未合先王制禮之意乃存僖祖室以備七室治
平四年英宗將祔廟太常禮院請以神主祔第八室祧
藏僖祖及后神主於西夾室自仁宗而上以次遞遷翰
林承旨張方平議同遂從之熙寧中王安石爲相欲復
僖祖請付兩制議翰林學士元絳等議與安石同謂自
古受命之王旣以功德享有天下皆推其本統以尊事
其祖故商周以契稷有功於唐虞之際謂之祖有功若

必以有功而爲祖則夏后氏不郊鯀矣今太祖受命之初立親廟自僖祖以上世次旣不可知則僖祖之爲始祖無疑矣儻謂僖祖不當比契稷爲始祖是使天下之人不復知尊祖而子孫得以有功加其祖考也翰林學士韓維天章閣待制孫固祕閣校理王介議各不同孫固語見本傳同判太常寺張師顏等詳定上議與孫固同謂商周之興本於契稷故奉爲太祖後世受命之君功業特起不因先代則親廟迭毀身自爲祖鄭玄云夏五廟無太祖禹與二昭二穆而已張薦云夏后以禹始封遂爲不遷之祖是也韓愈有言事異商周禮從而變

晉琅邪王德文曰七廟之義自由德厚流光享祀及遠
非是爲太祖申尊祖之祀其說是也國家以僖祖親盡
而祧奉景祐之詔以太祖爲帝者太祖是合於禮矣安
石力主元絳初議遂復僖祖祧順祖神主於夾室元豐
元年詳定所圖上八廟異宮之制以僖祖爲始祖居中
翼祖太祖太宗仁宗爲穆在右宣祖真宗英宗爲昭在
左皆南面北上陸佃言太祖之廟百世不遷三昭三穆
親盡則迭毀說者以昭常爲昭穆常爲穆則尊卑失序
復圖上八廟昭穆之制以翼祖太祖太宗仁宗爲昭在
左宣祖真宗英宗爲穆在右皆南面北上何洵直圖上

八廟異宮引熙寧儀僖祖正東向之位英宗以上爲昭
南面仁宗以上爲穆北面又以晉孫毓唐賈公彥言始
祖居中三昭在左南面西上三穆在右南面東上爲兩
圖上之又言翼祖宣祖在二祧之位順祖實去祧之主
禮宜有殺俱未及施行八年神宗將祔廟禮寺言七世
八室已有定制請祧翼祖于夾室祔神宗于第八室自
英宗上至宣祖以次升遷從之元符三年禮部太常寺
言哲宗升祔宜如晉成帝故事於太廟殿增一室候祔
廟日神主祔第九室詔下侍從官議蓋李清臣爲禮部
尚書首建此議侍郎趙挺之等和之會清臣爲門下侍

郎論者多傳會惟蔡京謂哲宗父子相承自當爲世若不祧遠祖則三昭四穆與太祖之廟而八矣陸佃曾肇等亦謂古無八世之廟宜上遷宣祖以合古三昭三穆之義二議上清臣辟說甚力帝迄從之崇寧二年祧宣祖于夾室居翼祖之次三年詔曰去古既遠諸儒之說不同鄭氏謂太祖及文武不祧之廟與親廟四爲七是不祧之宗在七廟之內王氏謂非太祖而不毀不爲常數是不祧之宗在七廟之外宜令有司復議禮官言先王之制廟止於七後王以義起禮乃有增置九廟者禮部尚書徐鐸亦請復翼祖宣祖以備九廟遂以鐸爲脩

奉使增太廟殿爲十室復翼宣二祖焉高宗建炎二年
奉太廟神主于揚州壽寧寺三年幸杭州奉安于溫州
紹興五年始建太廟于臨安奉迎安置七年十二月徽
宗祔廟三十二年欽宗祔廟始祧翼祖于夾室淳熙十
五年高宗祔廟太常少卿尤袤等定號高宗洪邁獨請
號世祖袤率禮官顏師魯鄭僑奏曰在禮子爲父屈示
有尊也太上親爲徽宗子而子爲祖父爲宗失昭穆之
序議者不過以漢光武爲比光武以長沙王後布衣崛起
不與哀平相繼其稱無嫌太上以子繼父恐在天之
靈有所不安邁論遂屈孝宗詔從禮官議衆論紛然會

禮部太常寺亦謂本朝創業中興皆在商丘取商高宗實爲有證詔從初議至是太廟凡九世十二室二初仁宗尊藝祖太宗真宗爲百世不祧之廟後哲宗尊仁宗神宗光宗尊高宗並不祧以後祧祧見下篇

宗廟之禮歲五享朔望上食薦新三年一祫五年一禘新主祔謁及親郊封祀朝享告謝皆大祀也咸平二年太常禮院言禮三年一祫以孟冬又疑義云三年喪畢遭禘則禘遭祫則祫宜改孟冬薦享爲祫享天聖元年禮官言自天禧二年禘享已及五年合行禘禮遂以孟夏薦享爲禘享八年當祫亦以孟冬薦享爲祫享嘉祐

四年十月仁宗親行祫享同判宗正寺趙良規請正太祖東向位知太常禮院韓維謂宜如舊虛東向之位便觀文殿學士王舉正等議曰大祫之禮所以合昭穆辨尊卑必以受命之祖居東向之位本朝以太祖爲受命之君然僖祖四廟在二故每遇大祫止列昭穆虛東向魏晉以來已用此禮宜如舊便禮官張洞韓維言國朝每遇禘祫奉別廟四后配食義當革正學士孫抃等議謂如舊便學士歐陽脩等曰古者宗廟之制皆一帝一后後世有以子貴者始著並祔之文不當祔者則有別廟之祭本朝以別廟之后列配后之下非惟於古無文

於今又四不可詔四后祫享只依舊熙寧八年有司言
已尊僖祖爲太廟始祖孟夏禘祭當正東向之位又言
太廟禘祭神位已尊始祖居東向之位自順祖而下昭
穆各以南北爲序自今禘祫著爲定禮元豐元年詳定
郊廟禮文所言禘祫之義存於周禮春秋而不著其名
行禮之年經皆無文唯公羊傳曰五年而再盛祭禮緯
曰三年一祫五年一禘而鄭氏徐氏二說不同慶曆初
用徐邈說每三十月一祭熙寧八年旣禘而祫此有司
之失也請今依鄭氏十八月而禘禘四十二月而祫庶
幾舉禮不煩事神不瀆太常禮院亦以爲言詔如見行

典禮詳定所又請每禘祫之月雖已大祭仍行時享以嚴天子備禮又言禮不王不禘虞夏商周四代所禘皆以帝有天下也今僖祖而上譜失其傳則禘禮當闕神宗亦以爲然南渡之後有祫而無禘紹興五年吏部員外郎董弁言熙寧之初王安石奮其臆說俾章衡建議尊僖祖爲始祖及蔡京用事一遵安石之術請立九廟沿襲至今太祖尚居第四室遇大祫處昭穆之列今若正東向之尊委合禮經太常寺丞王普又言太祖卽廟之始祖是爲廟號非謚號也熙寧尊僖祖爲始祖儻以爲是僖祖當稱太祖而太祖當改廟號然則太祖之名

不正前日之失大矣今宜奉太祖神主居第一室永爲
廟之始祖則宗廟之事盡合禮經無復前日之失矣孝
宗淳熙初詔禮官討論別建四祖廟正太祖東向位未
及施行孝宗崩將祔廟太常少卿曾三復請祧僖宣二
祖就正太祖東向之位其言甚切既而吏部尚書鄭僑
等亦乞因大行祔廟之際定宗廟萬世之禮慰太祖在
天之靈破熙寧不經之論又言王安石以私意復僖祖
執議甚堅孫固議權居東向之位旣曰權居則當釐正
明矣詔從之閏十月鄭僑等又言僖祖當用唐興聖之
制立爲別廟順祖翼祖宣祖之主皆祔藏焉如此則僖

祖自居別廟之尊三祖不祔子孫之廟自漢魏以來太祖而上毀廟之主皆不合食今遇祫則卽廟而享於禮尤稱諸儒如樓鑰陳傅良皆以爲可詔從之時朱熹在講筵獨入議狀條其不可者四大略云當以僖祖爲始祖如周之后稷太祖如周之文王太宗如周之武王與仁宗之廟皆萬世不祧昭穆而次以至高宗之廟亦萬世不祧又言元祐大儒程頤以爲王安石言僖祖不當祧復立廟爲得禮竊詳頤之議論與安石不同至論此事則深服之足以見義理人心之所同固有不約而合者特以司馬光韓維之議偶不出此而安石乃以變亂

穿鑿得罪於公議故欲堅守二賢之說并安后所當取者而盡廢之今以程頤之說考之則是非可判矣議既上寧宗召對令細陳其說熹先以所論畫爲圖本貼說詳盡至是出以奏陳久之寧宗再三稱善且曰可於榻前撰數語徑自批出熹方懲內批之弊因乞降出劄子再令臣僚集議寧宗亦然之熹既退卽進擬詔意以上意諭廟堂則聞已毀四祖廟而遷之矣及光宗祔廟遂復爲九世十二室蓋自昌陵祔廟踰二百年而後正太祖之位紹定四年九月行都大火延及太廟太常少卿度正等請參酌朱熹之制詔侍從禮部太常集議後竟

五季系卷二十一
不行

時享太祖乾德六年判太常寺和峴上言唐天寶五年
詔享太廟宜祭料外每室加常食一牙盤將來享廟及
禘祫時享亦準此制從之元豐中詳定郊廟奉祀禮文
所言四時雖有薦新而孟享禮料無祠禴蒸嘗之別伏
請春加韭卯夏加麥魚秋加黍豚冬加稻鴈當饋熟之
節薦於神主其籩豆於常數之外別加時物之薦豐約
各因其時以應古禮從之又宜令戶部陳歲貢以充庭
實如古禮仍以龜爲前金次之玉帛又次之餘居後又
古者祭祀兼薦上古中古及當世之食故唐天寶薦牙

盤議者以爲宴私之饌可薦寢宮而不可瀆於太廟宜
罷之元祐七年禮官呂希純建議請依祖宗舊制薦牙
盤更其名曰薦羞紹熙五年寧宗卽位時有孝宗之喪
浙東提舉李大性言自漢文帝以來皆卽位而謁廟陛
下龍飛已閱三月鑿輿屢出過太廟門而不入揆之人
情似爲闕典詔迺遵用三年之制禮寺以爲俟從吉討
論施行理宗卽位行三年喪明堂朝享以大臣攝事卽
吉後始親享

薦新呂氏月令一歲八薦新開元禮加五十餘品宋初
倣開元禮其後薦冰之外悉寢不行景祐中禮官議以

呂紀簡而近薄唐令雜而不經乃更定四時所薦凡二十八物元豐禮官復參定取其間先王所嘗享用膳羞之物見於經者存之孟春薦韭以卵羞以葑仲春薦冰季春薦筍羞以合桃又季春薦鮪闕則代以魴鯉孟夏嘗麥以雉仲夏嘗雞以黍羞以瓜季夏羞以苽以菱孟秋嘗栗與稷羞以棗以梨仲秋嘗麻嘗稻羞以蒲季秋嘗菽羞以免以栗孟冬羞以鴈仲冬羞以麇季冬羞以魚舊有來禽菴麥諸與之類及季秋嘗酒並刪去又依古禮不卜日不出神主既而知宗正丞趙彥若言仲秋蒲無白改從春獻大觀禮局亦言當隨時宜勿拘月令

政和四年以比部員外郎何天衢言薦新偶與朔祭同日者移次日中興仍舊制若乃皇帝躬畋獵以所獲禽付所司薦太廟曰太宗著爲令焉

加上祖宗謚號建隆元年九月二十七日太祖御崇元殿備禮分遣宰臣奉玉冊四上四廟謚號高祖曰文獻皇帝廟號僖祖妣崔曰文懿皇后曾祖曰惠元皇帝廟號順祖妣桑曰惠明皇后祖曰簡恭皇帝廟號翼祖妣劉曰簡穆皇后考曰昭武皇帝廟號宣祖祥符天禧以後乃有加謚之禮天禧元年正月加上六室尊謚僖祖曰文獻睿和順祖曰惠元睿明翼祖曰簡恭睿德宣祖

曰昭武睿聖大觀元年九月加上僖祖爲十六字曰立道肇基積德起功懿文憲武睿和至孝自太祖以下初祔但六諡加則十有六獨政和二年加神宗諡至二十乃蔡京所定也詳見本紀元豐以後易加上尊諡曰奉上徽號紹興十三年儀注尤詳

廟諱建隆元年改天下郡縣犯御名廟諱者紹興二年禮官言漢法邦字曰國盈字曰滿第讀曰國曰滿本字見經傳者未嘗改易司馬遷作史記亦不改易今定淵聖御名若姓氏之類去木爲巨其見經傳以威武爲義者讀曰威以回旋爲義者讀曰旋以植立爲義者讀曰

植本字卽不當改易庶萬世之下有所考證紹興末祧翼祖禮官請依禮不諱詔臣庶命名仍避祧廟正諱

后廟之制國初自昭憲杜太后以上四代竝祔太廟無別有所謂后廟也太祖建隆三年追冊孝惠賀皇后就陵所置祠乾德元年孝明王皇后崩始議置廟及二后先後之次太常博士和峴請共殿別室以孝明正位內朝居上室及太祖祔廟遂獨以孝明配太宗淑德尹皇后懿德符皇后追冊定諡皆以懿德居上其祔享后廟亦然至道初太祖孝章宋皇后崩祔后廟右司議孝章宜居上室真宗詔居懿德下及太宗祔廟遂獨以懿德

配真宗追冊所生母元德皇太后以神主祔后廟大中
祥符中禮官趙湘請升祔太廟宰相王旦與群臣表請
尊號去太字祔太廟明德之次從之真宗章懷潘皇后
章穆郭皇后初亦祔享后廟及真宗祔廟獨以章穆配
其後有司議章獻劉皇后及仁宗所生母章懿李皇后
廟祀皆謂章穆已祔太廟自協一帝一后之文章獻輔
政十年章懿誕育聖躬功德莫比退就后廟未厭衆心
按周官大司樂職奏夷則歌仲呂以享先妣者姜嫄也
帝嚳之妃后稷之母特立廟曰閼宮今宜別立新廟奉
安二太后神主同殿異室歲時薦享用太廟儀自為廟

名樂曲以崇世享於是作新廟名曰奉慈慶曆五年禮
院言章獻章懿二后請遵太宗懿德明德元德同祔太
廟故事遷祔真宗廟下兩制議遂遷二后祔於章穆之
次保慶楊太后崩曰章惠太后亦祀於奉慈廟治平初
判禮院呂公著言按喪服小記慈母不世祭其奉慈廟
乞依禮廢罷英宗不欲遽下禮官議會帝崩神宗立乃
命官奉章惠神主瘞陵園元豐六年詳定所言按禮夫
婦一體故昏則同牢合巹終則同穴祭則同几同祝饌
未嘗有異廟者也惟周人以姜媯爲祿神而帝嚳無廟
又不可下入子孫之廟乃以別廟而祭故魯頌謂之閟

宮周禮謂之先妣可也自漢以來不祔不配者皆援姜
嫄爲比或以其微或以其繼而已蓋其間有天下者起
於側微而其后不及正位中宮或以嘗正位矣有所不
幸則當立繼以奉宗廟故有祖始三人則祔於親者之
說立繼之禮其來尚矣始微終顯皆嫡也前娶後繼皆
嫡也後世乃以始微後繼寔之別廟不得伸同凡之義
則非禮意恭惟太祖孝惠皇后太宗淑德皇后真宗章
懷皇后實皆元妃而孝章則太祖繼后乃皆祭以別廟
在禮未安請升祔太廟增四室以時配享從之若乃貴
妃有廟始於仁宗溫成儀數視后廟未幾以諫官言改

爲祠殿徽宗顯恭王皇后初祀別廟而貴妃明達明節
竝援溫成於顯恭別廟內增建殿室祔享及徽宗祔太
廟顯恭乃升祔焉高宗邢皇后崩於太廟內脩建殿室
爲別廟其後孝宗追冊郭皇后亦於邢后廟分爲二室
以西爲上各置戶牖奉安乾道三年孝宗夏皇后崩神
主亦祔別廟爲三室及高宗孝宗祔太廟三后隨升祔
焉

景靈宮扞於大中祥符五年聖祖臨降爲宮以奉之天
聖元年詔脩宮之萬壽殿以奉真宗明道二年又建殿
奉安章懿皇后治平中又建殿以奉仁宗又建殿以奉

英宗凡七十年間太祖以下神御在宮者四寓寺觀者十有一元豐五年始就宮作十一殿悉遷在京寺觀神御奉安累朝文武元勳十餘人圖形兩廡爲配享紹聖二年又奉安神宗焉徽宗卽位宰臣請特建景靈西宮奉安神宗以舊殿爲館御之首昭示萬世尊異之意建哲宗神御殿於西以東偏爲齋殿乃給度僧牒紫衣牒十道爲營造費戶牖工巧之物並置於荆湖北路已而右正言陳瓘言五不可且論蔡京矯誣不聽旣又建神宗欽聖皇后欽慈皇后神御殿及哲宗昭懷皇后神御殿於是兩宮合爲前殿九後殿八山殿十六及齋宮廊

庶共二千三百一十區初東京以來奉先之制太廟奉
神主歲五享宗室諸王行事朔祭月薦新太常卿行事
景靈宮奉塑像歲四孟皇帝親享遇郊祀明堂則先期
二日詣宮行禮謂之朝獻次太廟謂之朝饗紹興中臣
僚言景靈宮奉祖宗衣冠之游卽漢原廟也今原廟神
游猶寄永嘉乞隨宜建置迎還眸容躬行獻禮從之後
又依舊制繪累朝配享功臣於庶壁

神御殿古原廟也以奉安先朝御容自宣祖太祖而下
匪直諸宮院有之睦親廣親二宅亦竝建神御殿皇祐
中翰林學士歐陽脩言神御非人臣私家之禮禮官亦

謂漢用春秋之義罷郡國廟詔以廣親宅置已久唯罷
脩睦親宅熙寧二年知大宗正丞事李德芻復以爲言
乃詔迎藏天章閣自是民間凡有御容悉取藏禁中元
豐五年遷安於景靈宮在京宮院神御所存惟萬壽觀
延聖廣慶寧華三殿而已南渡初斬寄神御於溫州開
元寺後詔迎赴闕紹興十五年建神御殿于崇政殿之
東親酌獻用家人禮其後高宗以下神御皆奉安焉
功臣配享咸平二年詔以趙普配享太祖廟庭繼又以
曹彬配享太祖以薛居正潘美石熙載配享太宗乾興
元年以李沆王旦李繼隆配享真宗嘉祐八年以王曾

呂夷簡曹瑋配享仁宗熙寧八年以韓琦配享英宗元豐元年又以曾公亮配元祐初以富弼配享神宗紹聖初又以王安石配三年謂富弼得罪先帝罷配享宗寧元年以蔡確配享哲宗建炎初詔罷蔡確更以司馬光配既又罷王安石配享神宗復以富弼配紹興八年以韓忠彥配享徽宗淳熙中高宗祔廟用洪邁議以呂頤浩趙鼎韓世忠張俊配享吏部侍郎章森乞用張浚岳飛祕書少監楊萬里乞用張浚皆不報紹熙五年以陳康伯配享孝宗嘉定十四年又以史浩配嘉泰元年以葛邲配享光宗端平二年以趙汝愚配享寧宗其欽宗

理宗度宗三廟並闕自真宗行配享禮仍奏告本室禘
祫皆配之熙寧末議禘祫外親享太廟並以功臣與
羣臣家廟本周制適士以上祭於廟庶士以下祭於寢
唐原周制崇私廟五季之亂士大夫無襲爵故不建廟
而四時寓祭室屋慶曆郊恩許中外文武依舊式立家
廟宋庠繼以爲言乃定議制度凡立廟者適子襲爵主
祭事竟不行大觀二年議禮劄議文臣執政官武臣節
度使以上祭五世文武升朝官祭三世餘二世及祭器
有差從之紹興中賜秦檜家廟并祭器後援爲例

宋史新編卷二十七

宋史新編卷二十八

志十四

明南京戶部主事莆田柯維騏著

禮三

嘉禮主飲食婚冠賓射饗宴慶賀之事亦周制也而宋舊史又以歲時朝會養老宣赦附之今依政和禮分朝會爲賓禮餘如其舊云

尊號之典每大祀羣臣詣東上閣門拜表請上尊號或三上或五上多謙抑弗許如允所請卽奏命大臣撰冊文及書冊寶遣官奏告天地宗廟社稷其受冊多用祀禮畢日御正殿行禮羣臣拜舞呼萬歲皇帝宣制曰朕

以鴻儀昭舉保命會昌迫於羣情祇膺顯號退循寡昧
惕懼增深儀節多不錄禮畢有司奉冊寶詣閣門進入
內神宗初立宰臣曾公亮等上表請加尊號詔不允先
是翰林學士司馬光言尊號起唐武后中宗之世遂爲
故事先帝治平二年辭尊號不受天下莫不稱頌聖德
其後佞臣建言國家與契丹常有往來書彼有尊號而
中國獨無足爲深恥於是羣臣復以非時上尊號論者
甚爲朝廷惜之今陛下方在亮陰之中考之事體似未
宜受詔賜光曰朕方以頻日淫雨甲申地震天威彰著
可虞傾禍被此鴻名有慙面目况在亮陰亦難當是盛

典今已批降指揮可善爲答辭使中外知朕至誠慙懼
非欺衆邀名後宰臣屢請終不允徽宗高宗內禪並稱
太上皇帝孝宗下禮官議援漢高祖故事五日一朝德
壽宮太上限朔朔望復下有司議每月朔望及初二
十三日詣宮起居孝宗光宗內禪竝如之靖康時道君
冊禮中輟孝宗初上德壽冊文依母后稱嗣皇帝乾道
六年周必大援唐憲宗故事定議稱皇帝
太皇太后皇太后冊禮天子稱嗣皇帝餘槩如尊號儀
皇太妃亦有冊禮多不果行

冊立皇后建隆元年立王氏爲皇后命所司擇日備禮

冊命自後凡制書云冊命者多不行冊禮后妃皆寫冊命告身有司進入學士院草制宣於正殿近臣牧守宗室皆修貢禮群臣拜表稱賀又詣內東門奉牋賀皇后真宗冊劉皇后不欲令藩臣貢賀不降制止命學士草詞付中書仁宗冊曹皇后冊制如皇太子玉用珉寶用金文曰皇后之寶禮與通禮異元祐五年八月哲宗將納后太皇太后詔檢詳古今六禮沿革參考通禮典故具爲成式群臣又議勘昏御史中丞鄭雍等請不用陰陽之說呂大防亦言不可從之七年四月以尚書左僕射兼門下侍郎呂大防等竝攝太尉充六禮使同知樞

密院事韓忠彥等副之事在孟后傳五月甲午行納采
問名禮丁酉行納吉納成告期禮戊戌帝御文德殿發
冊及命使奉迎主人謂后曰戒之戒之夙夜無違命毋
施衿結悅曰勉之戒之夙夜無違命禮成擇日詣景靈
宮行廟見禮大觀四年冊鄭皇后議禮局重定儀注損
益開寶禮其朝謁景靈宮止依近例紹興十三年冊吳
皇后亦異元祐儀

冊皇太子至道元年立真宗爲皇太子命有司草冊禮
有司言前代無太子執圭之文請如王公執桓圭餘如
舊制有司又言唐禮宮臣參賀皆舞蹈開元始罷之故

事百官及東宮接見祇呼皇太子上牋啓稱皇太子殿
下百官稱名宮官稱臣常行用左春坊印宮中行令又
按唐制凡東宮處分論事之書太子並畫令左右庶子
以下署名姓宣奉行書按畫日其與親友師傅不用此
制請如開元之制宮臣止稱臣不行舞蹈禮今皇太子
兼判開封府所上表狀卽署太子之位其當中書樞
密院祇判官等署餘斷案及處分公事並畫諾詔惟改
諾爲準餘並從之神宗未及受冊卽位乃以冊寶送天
章閣遂爲故事孝宗冊皇太子受冊之三日當謁廟皇
太子言設仗乘金輅雖有故事非臣子所安詔免

冊皇太子妃真宗爲太子性謙慎凡官僚稱殿下冊妃皆乞寢罷太宗嘉納之故章穆終太宗世止爲夫人欽宗升儲議禮局上冊妃新儀粟金輅親迎皇太子三奏辭乘輅及臨軒冊命詔免乘輅而發冊如禮

公主受封降制有冊命之文多不行禮惟以綸告進內嘉祐二年封福康公主爲兗國公主始備禮冊命其冊印如貴妃有匣文曰兗國公主之印遂爲定制

冊命親王大臣具開寶通禮雖制書有備禮冊命之文多上表辭免未嘗行政和禮局上其儀迄不果行

聖節立名自唐千秋節始宋因之皇太后臨朝亦立節

名餘則否太祖長春節先一月於大相國寺建道場祝壽至日上壽退百僚詣寺行香尋詔今後長春節及諸慶節臣庶毋得進奉累朝儀注微有異同有故則罷上壽仁宗定皇太后上壽儀皇太后垂簾宗政殿宰臣進酒奏曰長寧節臣等不勝歡忭謹上千萬歲壽皆再拜內臣承旨宣曰得公等壽酒與公等同喜皆再拜舞蹈太后還內百官拜表稱賀內外命婦上壽如百官儀隆興初孝宗詣德壽宮上太上皇帝壽皇帝奉酒奏臣某謹率文武百僚稽首言天申節臣某與百僚等不勝大慶謹上千萬歲壽宣答曰得皇帝壽酒與皇帝并百僚

內外同慶餘儀如皇太后淳熙二年十一月詔太上皇
帝聖壽新歲七十以冬至加上尊號冊寶十二月某日
立春行慶禮其日依大禮例用四十八架樂正樂工用
一百八十八人百僚簪花赴文德殿聽宣赦訖從帝至
宮上壽稱賀車駕往還並張樂珥花備極情文十三年
壽八十元日帝率羣臣詣宮行禮如前儀

諸慶節真宗時始有之大中祥符元年詔以正月三日
天書降日爲天慶節休假五日兩京諸路州府軍監前
七日建道場設醮斷屠宰節日士庶特令宴樂京師然
燈又以六月六日爲天貺節又以七月一日聖祖降日

爲先天節十二月二十四日降延恩殿日爲降聖節休
假宴樂竝如天慶前一日以延壽帶續命縷分賜百官
節日戴以入禮畢宴於錫慶院天禧初詔以大中祥符
元年四月一日天書再降內中功德閣爲天禎節尋改
爲天祺節避仁宗嫌名也政和三年十一月五日以天
真示現日爲天應節又以五月十二日祭方丘日爲寧
貺節又以二月十五日太上混元上德皇帝降聖日爲
真元節八月九日青華帝君生辰爲元成節正月四日
有太祖神御之州府宮殿行香爲開基節十月二十五
日爲天符節皆如天慶節著爲令南渡後其禮多廢獨

外。猶詣天慶觀朝謁。遂休務。至前後各一日。共邁謂其敬事司命過於上帝為非禮云。

宴饗。凡春秋季仲聖節郊籍禮。世巡幸還京及國有大慶。皆大宴。遇災則罷。其日殿庭設山樓排場為群僊隊仗。六番進貢九龍五鳳之狀。宰相以下升殿進酒。各就坐酒。九行更衣。賜花有差。太平興國後止。設春宴淳化四年。直史館陳靖上言。宴以禮成。賓以賢序。風雅之作。茲為盛焉。其有拜起失節。喧譁過甚。及執事者失於察視。宴饌不及潔豐。竝申嚴制。後御史中丞李昌齡亦以為言。竝從之。咸平三年始備設。春秋大宴五年以翰林

學士梁顥請春秋大宴小宴賞花行幸次爲四圖頒下
閣門遵守景德以後屢申諭儀制委御史大夫以下察
視彈奏故事大宴前一日御殿閱白戲謂之獨看哲宗
初立范祖禹言是日進神宗紀草卽觀百戲理似未安
詔罷獨看元祐三年罷春宴又罷秋宴以魏王出宿翰
林學士蘇軾不進教坊致語故也大觀三年議禮局上
集英殿春秋大宴儀紹興中詔宴殿陳設止用緋黃二
色不用文繡令有司遵守更不制造遂更立儀注乾道
八年詔今後惟正旦生辰郊祀及金使見辭各有宴慶
元間昇平日久京尹趙師舜請併設春宴倣唐曲江遺

意卽於行都西湖用舟船妓樂自寒食前依品秩排日宴會並京尹館伴李潞爲尹復奏舉如前開禧以後兵興及追擾百色行鋪爲民害不復舉矣

曲宴凡幸池苑觀稼畋獵惟從官預謂之曲宴暮春後苑賞花釣魚則三館祕閣皆預雍熙元年三月十五日詔近臣賞花後苑各賦詩帝習射水心殿二年四月二日賞花釣魚始有曲宴仍賦詩習射咸平二年二月晦宴後苑帝作中春賞花釣魚詩儒臣皆賦因習射盡歡而罷自是爲定制皇祐五年後苑寶政殿割麥帝謂輔臣曰朕新作此殿不欲植花歲以種麥庶知穡事不易

自是觀稼就後苑春夏賞花釣魚則歲爲之嘉祐七年十二月召兩府等官再會天章閣觀三朝瑞物復宴群玉殿上曰天下久無事今日之樂與卿等共之宜盡醉勿復辭因召韓琦至御榻前別賜一大卮出禁中名花金盤貯香藥令各持歸莫不霑醉熙寧後凡實錄國史成俱宴垂拱殿大觀議禮局上垂拱殿曲宴儀又有上巳重陽賜宴儀

游觀天子歲時游豫則上元幸集禧觀相國寺御宣德門觀燈首夏幸金明池觀水嬉瓊林苑宴射人祀禮成則幸太一宮集禧觀相國寺恭謝或請請寺觀焚香或

至近郊閱武校獵觀射觀稼其事不一其校獵觀射觀
稼往往賜武士農夫織婦錢帛及父老飲食云

三元觀燈本方外之說唐以後常於正月望夜開坊市
門然燈宋因之上元前後各一日城中張燈大內正門
結綵爲山樓影燈起露臺教坊陳百戲天子先幸寺觀
行香遂御樓或御東華門及東西角樓從臣預宴四夷
蕃客各依本國歌舞列樓下亦賜酒食勞之東華左右
掖門東西角樓城門大道大宮觀寺院悉起山棚張燈
樂皇城雉堞亦徧設其夕開舊城門達旦縱士民觀遇
籍田及兵喪災變則罷乾德五年詔開封府更放十七

十八兩夜遂爲例徽宗窮極宴樂宣和六年之事見五行志若中元下元張燈自淳化初詔廢罷矣

賜酺自秦始皇法三人以上會飲則罰金故因事賜酺吏民會飲過則禁之唐嘗一再舉行太宗雍熙元年十二月詔賜酺三日帝御丹鳳樓觀酺召侍臣賜飲自樓前至朱雀門張樂作山車旱船往來御道又集開封府諸縣及諸軍樂人列於御街音樂雜發觀者溢道縱士庶遊觀遷市肆百貨於道之左右召畿甸耆老列坐樓下賜之酒食明日賜群臣宴於尚書省仍作詩以賜又明日又宴群臣獻歌詩賦頌者數十人真宗時累賜京

邑及東封所過州府父老觀酺錫宴皆如舊儀天禧五年詔開封府賜酺日罪人酹酒而不傷人者咸釋之再犯論如法宋之繁庶於斯爲盛後遂爲定制

巡幸唐開元禮有告至肆覲考制度之儀開寶通禮因之太祖幸西京所過賜夏稼田租之半真宗朝諸陵及舉大禮所過賜兵卒時服錢復父老茶帛吏民有以饗餼酒果方物獻者計直答之命官籍繫囚逋負引對多原釋仍採訪民間疾苦振恤鰥寡孤獨車服度量權衡有不如法則舉儀制禁之有奇材異德若政事尤異者孝子順孫義夫節婦爲鄉里所稱者其不守廉隅昧於

正理者並條析以聞凡巡省東京舊城城門西京皇城
司並勘契內外城宮廟門並勘箭出入皆然入藩鎮外
城子城門亦勘箭

御明堂徽宗始建明堂禮制局上七議一曰古者朔必
告廟示不敢專請視朝聽朔必先奏告以見繼述之意
二曰古者天子負扆南向以朝諸侯聽朔則各隨其方
請自今御明堂正南向之位布政則隨日而御堂其間
月則居門焉三曰禮記月令天子居青陽總章每月異
禮請稽月令十二堂之制修定時令使有司奉而行之
四曰月令以季秋之月爲來歲受朔之日請以每歲上

月於明堂受新曆退而頒之郡國五曰古者天子負屨
公侯伯子男蠻夷戎狄四塞之國各以內外尊卑爲位
請自今元正冬至及大朝會並御明堂遼使依賓禮蕃
國各隨其方立於四門之外六曰古者以明堂爲布政
之宮自今若有御劄手詔並請先於明堂宣示然後榜
之朝堂頒之天下七曰赦書德音舊制宣於文德殿自
今非御樓肆赦並於明堂宣讀政和七年九月一日詔
頒朔布政自十月爲始是月一日上御明堂平朔左个
頒天運政治及八年戊戌歲運曆數于天下文多不載
十一月一日上負屨御明堂南面以朝百辟退坐于平

朔頒政宣和初蔡京言秦以十月爲歲首故月令以孟冬頒來歲之朔今不當用請以季冬頒歲運于天下詔自今以正月旦進呈宣讀旣而王黼編類明堂頒朔布政與詔書條例氣令應驗凡六十三冊上之靖康元年詔罷頒朔布政

養老皇帝幸太學盛輿衛陳樂舞酌獻文宣王三祭酒再拜歸御幄遣使迎三老五更於其第國老庶老有司預戒之皇帝卽御坐三老五更服朝服杖而入各左右二人夾扶國老庶老亦服朝服以次入旣就坐三公授几九卿正履尚食執醬醢醢執爵史臣錄三老所論善

言善行前後行揖禮禮皇帝爲與焉

肆赦每郊祀卽駕駕至宣德門帝登樓肆赦倣前代金雞故事立雞竿於樓東南隅伎人四面緣繩爭上取雞口所銜絳幡獲者卽與之樓上以朱絲繩貫木鶴仙人乘之奉制書循繩而下至地以畫臺承鶴舍人宣制百官拜舞稱賀金雞者取天文天雞星明主恩赦也

視學古禮視學多爲養老東漢以後特爲講經或釋奠故宋制分養老視學爲二事累朝屢臨幸謁文宣王畢召儒臣講說從臣賜坐講官監學官諸生賜香或加恩有差元祐五年哲宗視學詣文宣王殿行釋奠禮再拜

乃御敦化堂講經遂幸昭烈武成王廟酌獻但肅揖而已徽宗改辟雍文宣王殿爲大成殿高宗作大成殿成安廟像其視學竝如元祐儀後遂爲定制

賜貢士宴州郡貢士曰鹿鳴宴其登第曰聞喜宴或于開寶寺或瓊林苑或禮部貢院或辟雍仍賜花有差政和二年二宴許用雅樂故事御製詩章賜第一人間有遍賜者慶元五年賜曾從龍以下七言四韻詩祕書監楊王休以下繼和以進自後每舉竝如之

幸祕書省太宗於崇文院建祕閣神宗改爲祕書省凡臨幸祕書監以下俱有賜南渡建祕書省成祕書少監

游操等援宜和故事請臨幸帝頒手詔勉勵之遂陳累
朝御書御製晉唐書畫三代古器次宣皇太子宰臣以
下觀訖退遂賜宴于右文殿賜游操三品服館閣各轉
一官淳熙五年九月孝宗幸祕書省賦詩群臣皆和
進書儀紹興二十年五月八日進呈中興聖統太常博
士丁屢明言乞比附進呈玉牒行禮自是凡進書竝倣
此惟進太上皇聖政則有詣德壽宮儀

大射之禮廢於五季淳化末始命有司講求儀注凡游
幸池苑或命宗室武臣射帝射中的從官再拜奉觴貢
馬爲賀預射官中者帝爲之解賜襲衣金帶勒馬不解

則不賜苑中皆有射棚節序賜宴則宗室禁軍大校牧
伯諸司使副皆令習射遂爲定制

鄉飲之禮古者鄉飲有三後世臘蜡百神春秋習射序
賓飲酒北儀不行於郡國唯貢士日設鹿鳴宴猶古者
賓與賢能行鄉飲之遺意也唐貞觀所頒禮惟明州獨
存淳化中會例行之政和禮局定飲酒祭降之節與舉
酒作樂器用之屬並參用辟雍宴貢士儀既又以河北
轉運判官張孝純言周官以六藝教士必射而後行古
者諸侯貢士天子試諸射宮請詔諸路州郡每歲宴貢
士於學因講射禮從之紹興十三年國子祭酒高闕草

且鄉飲儀上之僎介之位皆與古制不合諸儒莫解其指意慶元中朱熹以儀禮改定主賓僎介之位始有定說其主則州以守縣以介位于東南賓以里居年高及致仕者位于西北僎則州以倅縣以丞或簿位東北介以次長位西南三賓以賓之次者司正以衆所推服者相及贊以士之孰於禮者知學者皆尊用之

皇太子冠儀嘗行於大中祥符八年後徽宗親製冠禮沿革十一卷初加祝曰咨爾元子肇冠於阼筮日擇賓德成禮具於萬斯年承天之祐次加祝曰爰卽令辰申加元服崇學以讓一善皆得副予一人受天百福三加

祝曰三加彌尊國本以正無疆惟休有室大競懋昭厥德保茲永命進爵祝曰旨酒嘉薦有飶其香拜受祭之以定爾祥令德壽且日進無疆字之曰始生而名爲實之宿旣冠而字以益厥文永受保之承天之慶復宣敕曰事親以孝接下以仁遠佞近義祿賢使能古訓是式大猷是經太子曰臣雖不敏敢不祇奉

皇子冠初加進爵祝曰酒醴和旨籩豆靜嘉授爾元服兄弟具來永言保之降福孔皆再加進爵祝曰賓贊旣成肴核惟旅申加服禮儀有序允觀爾成承天之祐三加進爵祝曰旨酒嘉菜甘薦令芳三加爾服眉壽無

彌永承天休俾熾而昌字之曰歲日云吉威儀孔時昭告厥字君子攸宜順爾成德永受保之又敕戒曰好禮樂善服儒講藝蕃我王室女于兄弟不溢不驕惟以守之皇子曰臣雖不敏敢不祇奉

公主笄禮年十五雖未議下嫁亦笄三加祝詞大略如皇子字之詞曰歲日具吉威儀孔時昭告厥字令德攸宜表爾淑美永保受之可字曰某又宣訓辭曰事親以孝接下以慈和柔正順恭儉謙儀不溢不驕毋詖毋欺古訓是式爾其守之公主曰兒雖不敏敢不祇承

公主下降初被選尚者卽拜駙馬都尉賜玉帶襲衣銀

鞍勒馬采羅百匹謂之繫親下降前一日行五禮所司
設壻次於內東門外壻父醮而命之曰往迎肅雍以昭
惠宗祐子再拜曰祇率嚴命太宗楊國大長公主嫁節
度使柴禹錫子崇慶真宗特命主以舅姑禮謁禹錫非
常制也神宗卽位詔遵先帝遺旨尚主者不許升行茶
倫序語在英宗紀自此公主下降皆行舅姑禮徽宗詔
曰周稱王姬見於詩雅可改公主爲帝姬郡主爲宗姬
縣主爲族姬大長爲大長帝姬仍以美名易國號

諸王納妃王之聘禮白金萬兩宗室子五千兩其敵門

卿古

納采定禮納財親迎禮皆半之遠屬族卑皆又半之政

和議禮局上皇子納夫人及諸王以下皆備六禮黹命
及同牢廟見見舅姑諸儀加詳父黹命曰躬迎嘉耦釐
爾內治主人命女曰往之汝家以順爲正無忘肅恭毋
曰必恭必戒無違舅姑之命庶毋申之曰爾誠聽於訓
言毋作父母羞治平中詔壻家有二世食祿卽許娶宗
室女熙寧末又禁與卑賤惡逆之家通婚後又禁刑徒
人子孫須擇三代有任州縣官或殿直以上者

臣庶冠婚禮冠並用三加品官之子冠服稍別語在龔
服志婚六禮及諸儀四品以上槩如諸王以下婚四品
以下不用盥饋饗婦禮士庶人并聞名於納采并請期

於納成親迎之服三舍生及官子孫假九品服餘竝阜
衫衣折上巾無鴈奠者三舍生聽以羊庶人聽以雉及
雞鷩代父母醮命與品宮同

周官賓禮有朝覲宗遇會同聘視八者之目所以親諸
侯也政和別朝儀爲賓禮於古近之抑周封微子爲殷
後作賓王家宋錄柴周及宣聖後亦崇德尚賢意也故
皆爲賓禮其餘則有朝使之宴饌歲時之廩餽及外國
之使聘遠方之朝貢并附焉

大朝會宋承前代之制以元日冬至及五月朔行大朝
會禮羣臣稱賀上壽有喪及出師則輟若無事不視朝

則群臣表賀于閣門淳化三年正月朔命有司約開元
禮定上壽儀天聖四年十二月詔明年正月朔先率百
官赴會慶殿上皇太后壽酒畢乃受朝天安殿仍令禮
官詳定儀制熙寧初詔罷五月朔朝賀元豐中宋敏求
等奉詔上朝會儀及令式頒行之大略如天聖朝皇太
后儀致詞曰元正啓祚萬物咸新冬至易為啓運
推多日南長至伏惟
皇帝陛下應乾納祐與天同休答詞曰履新之慶冬至
易日
履長
之慶與公等同之群臣奉觴上壽元符元年四月得傳
國受命寶禮官言五月朔故事當大朝會乞就是日受
寶依上尊號寶用儀後徽宗以元日受八寶及定命寶

冬至受元圭皆于大慶殿稍更元豐儀南渡多故未暇
舉行及紹興十二年十月太后自金還臣僚請正至舉
行朝賀以明天子之尊十一月權禮部侍郎王賞等言
正旦冬至及大慶受朝受賀係御大慶殿其文德紫宸
垂拱殿禮制各有不同月朔視朝則御文德殿謂之前
殿正衙仍設黃麾半仗紫宸垂拱皆係側殿不設儀仗
元正在近大慶殿禮繁乞候來年冬至取旨詔從之至
期不果行十五年正旦始舉行如禮

常朝之儀唐以宣政爲前殿謂之正衙卽古之內朝也
以紫宸爲便殿謂之入閣卽古之燕朝也而外又有舍

元殿舍元非正至大朝會不御正衙則日見群臣百官皆在謂之常參後此禮漸廢後唐明宗始詔群臣五日一隨宰相入見謂之起居宋因其制皇帝日御垂拱殿文武官日赴文德殿正衙曰常參宰相一人押班其朔朔望亦於此殿五日起居則於崇德殿或長春殿中書門下爲班首崇德卽紫宸長春卽班拱也元豐官制行始詔侍從官而上日朝垂拱謂之常參官百司朝官以上每五日一朝紫宸爲六參官京朝官以上朔望一朝紫宸爲朔參官望參官遂爲定制故事宰相垂拱殿奏事畢始赴文德殿押班然或日昃未退則閣門傳宣放

班多不復赴及神宗卽位御史中丞王陶以皇祐編敕
押班儀制移中書謂天子新卽位不應墮廢朝儀不報
既而陶劾韓琦曾公亮不押班爲不恭琦公亮上表待
罪且言唐及五代會要月九開延英則餘日宰相當押
正衙班及延英對日未御內殿前傳宣放班則不押班
明矣自祖宗繼日臨朝宰相奏事至祥符初始詔循故
事押文德班以妨職浸廢乃至今日請下禮官詳定陶
坐紂司馬光代爲中丞請令宰相遵舊制不須詳定尋
詔宰相春分辰初秋分辰正垂拱殿未退聽勿赴文德
殿令御史臺放班光又言垂拱奏事畢春分以後鮮有

不過辰初秋分以後鮮有不過辰正請春分辰正秋分
辰初奏事未畢卽如今詔迺詔春秋分率以辰正元豐
既定朝參之制侍御史知雜事蒲中行上言百官赴文
德殿宰臣押班聞傳不坐則再拜而退謂之常朝遇休
假俸三日以上應內殿起居官畢集謂之橫行應見謝
辭者皆先赴文德殿謂之過正衙然在京釐務之官例
以別敕免參宰臣押班近年已罷而武班諸衙本朝又
不常置故今之赴常朝者獨御史臺官與審官待次階
官而已今垂拱內殿宰臣以下旣已日參而文德常朝
仍復不廢舛謬倒置莫此爲甚至於橫行參假與夫見

謝辭官先過正衙雖浴唐之故事然必俟天子御殿之日行之可也詔詳定官制所言今天子日聽政於垂拱以接執政及內朝之臣而更於別殿宣敕不坐實爲因習之誤又辭見謝自己入見天子則前殿正衙對拜爲虛文其連遇朝假則百官同赴內殿起居不當復有橫行參假宜如中行言於是常朝正衙橫行之儀俱罷

入閣儀唐制天子日御宣政殿正衙以見群臣必立仗朔望薦食陵寢不能臨前殿則御紫宸便殿乃喚正衙仗由宣政殿東西門而入是謂東西上閣門群臣俟於正衙者因隨以入故謂之入閣五代以來正衙旣廢而

入閣亦不講宋復行之太祖御崇元殿入閣者二太宗御文德殿入閣令楊徽之張洎定新儀文德殿卽唐宣政殿也眞宗行者二景德以後廢神宗命宋敏求重脩文德殿入閣儀敏求言紫宸殿與唐同宜御紫宸入閣翰林學士王珪等議閣門所載入閣儀止是唐常朝非盛禮也自是罷入閣敏求又言本朝惟入閣乃御文德殿視朝今旣罷入閣卽文德遂廢視朝請約唐制裁定朔望御文德殿儀以備正衙視朝之制學士韓維等以入閣圖增損裁定詔可

皇太后臨朝儀蔡邕獨斷云漢母后臨朝母后東面少

帝西面仁宗卽位幼明肅皇太后劉氏同御承明殿垂簾聽政寔采漢故事初宰臣丁謂有異議詳見后傳英宗卽位不豫權居柔儀殿東閣西室慈聖皇太后曹氏於內東門小殿垂簾處分兩府日入候問聖體因奏政事退詣太后小殿覆奏帝疾間御前後殿聽政兩府退朝猶於小殿覆奏哲宗卽位亦幼宣仁太皇太后高氏臨朝重定儀制每朔望六參帝御前殿百官起居畢詣內東門進榜子雙日御延和殿同垂簾日參官起居太皇太后移班少西起居皇帝有祥瑞邊捷帝御紫宸殿百官稱賀畢赴內東門賀太皇太后慈聖不同御殿不

立生辰不遣使契丹以英宗長君也徽宗卽位帝請欽
聖皇太后向氏同聽政三省樞密院聚議三朝故事曾
布以帝長君請如慈聖蔡卞欲依明肅宣仁有旨依嘉
祐治平故事布語同列曰奏事先太后次覆奏皇帝如
今日所得旨遂爲定式矣太后尋手書罷同聽政

皇太子元正冬至受群臣賀儀稱賀致詞云元正首祚

冬至云天
正至長

景福維新伏惟皇太子殿下與時同休答詞

云元正首祚

冬至云天
正長至

與公等均慶

皇太子與百官相見儀至道元年定兩省五品尚書省
御史臺四品諸司三品以上皆答拜餘悉受拜宮官自

左右庶子以下悉用參見之儀其宴會位在王公上與師傅保相見政和新儀皇太子東階西向再拜師傅保以下西階東向答拜若三少特見則三少先拜大觀二年定王嘉王府侍講沈錫奏請二王出就外學禮儀詔按祥符故事記室翊善見諸王皆下拜真宗特以張士遜爲王友命上答拜以示賓禮今講讀輔翊之官職在訓道亦王友傳也可如例答拜

朝儀班序太祖建隆二年有司上合班儀詔曰尚書中臺萬事之本而班位率次兩省官節度使出總方面古諸侯也又其檢校兼守官多至師傅三公而位居九寺

卿監之下甚無謂也其給事諫議舍人宜降於六曹侍郎之下補闕次郎中拾遺監察次員外郎節度使升於六曹侍郎之上中書侍郎之下餘悉如故乾德中詔重定儀制有司請令上將軍在中書侍郎之下大將軍在少卿監之下諸衛率副率在東宮五品之下內客省使視太卿客省使視太監引進使視庶子判四方館事視少卿閣門使視少監諸司使視郎中客省引進閣門副使視員外郎諸司副使視太常博士通事舍人從本品供奉官視諸衛率殿直視副率樞密承旨視四品朝官兼南班官諸司使者從本品副承旨視寺監丞諸房副

承旨視南省都事凡視朝官者本品下視京官在其上
開寶六年詔以晉王班宰相上語在本紀後齊王廷美
武功郡王德昭亦如之太宗命宰相班親王上閣門儀
制宰臣與親王立班分左右各爲班首宰臣樞密使帶
使相或帶郡王并使相作一行總爲中書門下班首其
親王獨行一班準封爵令他官不得參綴祥符元年醮
宴圖宰臣與使相在東親王及帶使相及邵王在西分
班坐乃特旨也元祐元年詔太師平章軍國重事文彥
博已降旨令獨班起居自今赴經筵都堂同三省樞密
院事並序位在宰臣之上

百官轉對自建隆詔內殿起居日令百官以次轉對限以二人其封章於閣門通進復鞠躬自奏宣徽使承旨宣答拜舞而出大中祥符末罷景德中復之治平中詔增二員熙寧初詔授外任者許轉對訖朝辭監察御史裏行張戢程顥言每欲奏事必俟朝旨或朝政有關及聞外事而機速後時則已無及况往復俟報必由中書萬一事干政府或致阻格請依諫官例牒閣門求對或有急奏卽許越次登對元豐中詔尚書侍郎同郎官一員奏事郎中員外郎番次隨之並不許獨留身紹聖初臣僚言文德殿視朝輪官轉對蓋襲唐制故祖宗以來

每遇轉對侍從之臣亦皆與焉元祐間因言者免侍從
官轉對續詔職事官權侍郎以上並免自此轉對止於
卿監郎官而已請自今視朝轉對依元豐以前條制重
和元年臣僚言祖宗舊制有五日一轉對者今惟月朔
行之有許朝官轉對者今惟待制以上預焉自明堂行
視朔禮歲不過一再則是畢歲而論思者無幾請遇不
視朔卽令具章投進又諸路監司未經上殿者雖從外
移先赴闕引對方得之官並從其議

百官相見儀太祖乾德二年詔詳定百官進見宰相及
參候長吏儀制翰林學士承旨陶穀等以品秩立差等

或當謁或庭參或答拜或受叅遇諸途或引避或分路
或斂馬側立須其過累朝更定加詳焉

錄周後太祖受禪下詔曰封二王之後備三恪之實所
以示子傳孫興滅繼絕夏商之居杞宋周隋之啓介鄗
古先哲王實用茲道矧余涼德歷試前朝雖周德下衰
勉從於禪讓而虞賓在位敢忘於蒸嘗其封周帝爲鄭
王以奉周嗣正朔服色一如舊制已而遷周六廟於西
京越二年鄭王出居房州未幾殂帝輟朝十日素服發
哀於便殿還葬慶陵之側曰順陵諡曰恭帝仁宗屢錄
柴氏後嘉祐四年著作郎何高奏求唐周之裔以備二

王之後下太常議曰古者立二王後不惟繼絕兼取其明德可法唐室世數已遠於經不合惟周則我受禪之所自義不可廢乃詔推柴氏譜系最長一人歲時親奉周祀給田十頃封崇義公近親以次承襲於是相州兵馬都監柴詠換殿中丞受封爵以祭器給之熙寧四年司馬光言周本郭姓世宗后姪爲郭氏後今存周後則宜封郭氏子孫以奉周祀帝問王安石對曰宋受天下於世宗柴氏也帝曰爲人後者爲之子安石曰爲人後於異姓非禮也豈可以天下之故而易其姓氏所出帝然之重和元年詔謂藝祖受禪于周而三恪之對不及

禮蓋未盡宜於崇義公之外禘柴氏最長見在者以其
祖父爲周恭帝後以其孫世爲宣義郎監周陵廟與知
縣請給以示繼絕之仁爲國三恪永爲定制淳祐九年
又求隋唐及柴氏李氏石氏劉氏郭氏以至吳越荆湖
蜀漢諸國之後皆命以官使守其祀

錄先聖後乾德四年以孔子四十四代孫宜爲曲阜縣
主簿太平興國三年以宜襲封文宣公累世繼襲語在
宜傳景祐二年以宗愿爲國子監主簿襲封至和初太
常博士祖無擇言孔子後襲封者在漢魏曰褒成褒尊
宗聖在晉宋曰奉聖後魏曰崇聖北齊曰恭聖後周隋

竝封鄒國唐初曰褒聖開元中始追謚孔子爲文宣王
又以其後爲文宣公不可以祖謚加後嗣遂詔有司定
封宗愿衍聖公令世襲仙源縣令舊以孔氏子弟充選
主祠事治平元年言者請重長民之官遂禁之熙寧中
以若蒙爲新泰縣主簿襲封元祐初詔襲封者改衍聖
爲奉聖無兼他職終身在鄉里主祠事增祀田百頃許
以其餘均贍族人若蒙弟若虛爲家衆宗壽等所舉襲
封宗壽等仍請自今衆議選擇不必子繼庶幾留意祖
廟惇睦族人崇寧二年復改奉聖爲衍聖宣和三年端
友襲封紹興二年玠襲封其後以楮以文遠以萬春以

洙終宋世皆襲封主祀事

群臣朝覲出使宴餞宋沿五代舊制大臣入覲及被召使回客省齋籤賜酒食或十日或七日或五日或一日或賜生料有差群臣使回朝見面賜酒食樞密節度使使相還朝咸賜宴於外苑見辭日長春殿賜酒五行仍設食當直翰林龍圖閣學士以上皇親觀察使預坐真宗詔兩省五品尚書省四品諸司三品以上同列出使許釀錢餞飲仍休假一日餘官任以休務日餞送

朝臣時節餽廩太宗雍熙二年重九日賜近臣飲于宰相李昉第故事宰相生日賜酒餼中書會輔臣真宗優

寵王旦特賜生日羊三十口酒五十壺米麪各二十斛
令諸司供帳京府具衙前樂於私第許宴其親友及庶
寮自是爲例後旦以廢務非便奏罷會而賜如故又制
大臣正至寒食竝客省齋籤賜羊酒米麪立春賜春盤
寒食神餒餉粥端午糗子伏日蜜沙冰重陽糕竝有酒
三伏日又五日一賜冰其次只賜節料立春奉內朝者
皆賜幡勝元祐二年冬至遣中使賜御筵於宰相呂公
著私第陳教坊樂出御飲器勸酒及暮給燭傳宣令繼
燭皆異恩也高宗於秦檜生日賜宴優詔不允辭語在
本紀其他節序賜予南渡後多權停

外國君長來朝儀凡外國君長來朝先遣使迎勞于候館皇帝服通天冠絳紗袍設黃麾仗及宮縣大樂御乾元殿國主及其從臣以次先後就位展拜錫宴于內殿遇大禮則進爵近臣及刺史正郎都虞候以上皆預

契丹國使入聘開寶八年契丹始講和於是有賀元正及聖節之使已而中輟及澶淵定盟和好復通有司遂定契丹國信使副朝見儀注政和詳定五禮有內殿朝辭宴餞諸儀不幸而殂則爲輟朝云

金國使入聘徽宗知金將滅遼故與通好待之甚厚宣和中金使來見于宣政殿徽宗臨軒授使者書自後屢

遣使來時引上殿奏事賜予不貲禮遇並用契丹故事
高宗南渡國勢削弱不能舉舊禮故事金使正旦入見
百官俱入至是上謂宰臣曰全盛之時神京會同朝廷
之尊百官之富所以夸示今暫駐於此事從簡便無庸
俱入使人見辭並賜食于殿門外紹興八年金使議和
就驛賜宴十四年以後非遇國喪並賜宴內殿孝宗時
每賀正使赴宴多遇上辛齋禁有司條治平用樂典故
以進及生辰使上壽適親郊散齋樞密副使陳俊卿奏
不宜用樂詔垂拱上壽止樂正殿猶爲使者權用後三
年賀使當朝辭復值散齋帝乃諭館伴以決意去樂及

議所以處之者如使人必以作樂爲言則移宴於館高宗崩帝力行三年之制金賀使至稽舊典當引對使人或許上壽惟輟樂不舉帝特却書幣就館遣行次年再至始用紹興故事移宴于館罷作樂寧宗居慈懿皇后喪待金賀使亦如紹興儀

夏國使入貢自乾德以來夏國歲以正旦聖節入貢凡蕃使見辭同日者先夏國次高麗政和中詔高麗使至復用熙寧例以文臣充接伴使副又升其使爲國信使錫宴內殿往還許上殿禮在夏國上詳見高麗傳

諸國朝貢凡外國自高麗而下有交州宜州黎州諸國

使人見辭大槩相同惟迂勞宴賚之數稍殺其黔州蠻所謂五姓蕃者見使人獨於後殿而禮又與諸國別云建隆二年占城國使入貢遇大禮特授檢校少傅加食邑其後他國之使亦然景德四年交州使人成雅等至適大宴舍光殿真宗以成雅坐遠升其位著優禮之語在交阯傳建炎以來高麗交阯大理先後求入貢高宗却之謂不欲以虛名勞民孝宗登極卽詔自今所在州軍以理諭遣毋得以聞